



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

tiryimiyim@aolima

tir yimiyim

TAPAK 8

AJP-i Tripura chuba jabaso
Pradyot-i Assam semdangtsü

England nung vaccine
passports amshi tenzüksü

VOL. XVIII NO. 324 (ADOK 324) DIMAPUR TENTONÜ (MONDAY) RONGJUI (SEPTEMBER) 06, 2021 ₹ 5.00

Northeast nung Nagaland-i tamajungba inyak: NITI Aayog

Guwahati, September 5, 2021 (Agencies): Northeast region nung poverty, health aser affordable energy maparen tamajungtiba inyakba state ji Nagaland lir, ta NITI Aayog-i metetdaktüsügo.

NITI Aayog-i North East Region (NER) dak rangloker yangluba Sustainable Development Goals (SDG) Index nung Nagaland kübok district 12 tashi 'performer' category nung züngsema lir.

Northeast nung state 7 kübok district ajak category pezü nung dena lir. Category telemsaji yamai lir- Aspirant (0-49), performer (50-64), front-runner (65-99) aser achiever (100).

SDG index ajanga Nagaland-i alizüing 6 nung kanga mejungi inyak ta shia lir. Alizüing 6 ji- no poverty, good health and well-being, affordable and clean energy, sustainable cities and communities, industry and innovation aser infrastructure.

Nagaland-i quality education, reducing inequalities, climate

action & peace, justice & strong institutions nung balaka meinyak. Ajsüaka, no hunger SDG, gender equality, clean water and sanitation, decent work aser economic growth atemabo junga inyak ta NITI Aayog report nung shialir.

State ajak nung telungpur khuret ajuruogo saka Nagaland nung telungpurtemi state sorkar azioka lir" ta Rights and Risks Analysis Group director, Suhas Chakma-i ashi.

"Manipur nung telungpur teloktemi tesüiba küm 10 shi ka yimjung olemtep lia arur. Northeast kübok tanga state tem nung telungpur khuret mali aser iba ya kanga tongtipang lir, kechiyong parnok (telungpur) den amalitep melii sorkar ketdangsiua mouteter" ta paisa ashi.

"Nagaland nung Opposition maliba sorkar lir aser iba ya India nung mangashidangba ka lir. Iba ajanga Nagaland nung obang meputep agi sünga aliba sayur" ta Suhas Chakma-isa ashi.

Centre-i Karbi Peace Accord sign süogo PM Modi-i NE nung telungpur khuret agientsü meranger

Guwahati, September 5, 2021 (Agencies): Honibarnü Centre-i Karbi telungpur teloktem aser Assam sorkar den Karbi Peace Accord sign sütepogo.

Centre sorkari Memorandum of Settlement (MoS) nung lateta aliba onük ajak mapa küma inyaktsütsü ta nangzükogo aser iba ajanga Karbi Anglong nung yimjung aser terenlok angutsü lenmang lapokogo.

"Prime Minister Narendra Modi-i North East nung telungpur khuret agientsü alizüing ayuba nung Karbi Peace Accord ya ka lir. Modi'er sorkari Assam litsü kümzüka ayutsü nangzüküer" ta Union Home Minister Amit Shah-isa ashi.

"Tanü Karbi Anglong tenanzüktep agiba ya Assam indang putiotsü nung zülüoka ayutsü. Prime Minister akümba sülen Narendra Modi-i northeast nung temolung agütsüba dang masü saka kechisarena ajak nung renlokdaktüsütsü atema inyakka arur" ta Shah-isa ashi.

"Iba policy ajanga dang onoki khuret ka khen ka agiener. Ozü sorkari nangzükba ajak mapa küma inyaktsü" ta paisa ashi.

Taruba küm pungu tsüingda Karbi tesemtem renlokdaktüsütsü atema küm shia Rs. 200 crores lemzüksütsü, ta Amit Shah-isa metetdaktüsü.

"Iba tenanzüktep agiba ajanga Karbi nungeri Karbi Anglong Autonomous Council (KAAC) nung shilem lemzüksü" ta Assam Chief minister Himanta Biswa Sarma-isa ashi.

Karbi Peace Accord ajanga lendenlen aliba Karbi nungera ajangzüksütsü, ta Sarma-isa ashi.

Taküm February ita Karbi telungpur telok 5 nungi züingsem 1,040 tashi temai adokba ajanga Karbi Peace Agreement indang

mapa inyaktsü tenzüka liasü.

Karbi telungpur teloktem tenüing nungi Karbi Longri North Cachar Hills Liberation Front (KLNLF) chairman Pradip Terang; People's Democratic Council of Karbi Longri (PDCCK) vice-chairman Kongkat Teron aser United People's Liberation Army (UPLA) chairman Wellesley Terang nungertemi MoS nung sign ashi.

Maneni, Karbi People's Liberation Tigers (KPLT) chairman Mensing Kramsa; Karbi People's Liberation Tigers (KPLT) ceasefire chairman Sam Sing Tisso aser Karbi People's Liberation Tigers (KPLT-R) chairman Run Rongpi nungertemia sign ashi.

Assam sorkar tenüing nung Assam chief secretary Jishnu Barua, additional chief secretary (Northeast), Ministry of Home Affairs; Assam chief minister Himanta Biswa Sarma aser KAAC CEM Tuliram Ronghang nungertemi sign ashi.

Karbi Peace Accord nung tongtipang onüktem:

- # Memorandum of Settlement (MoS) ajanga Karbi Anglong Autonomous Council nem tashi talila agütsütsü. Iba ajanga Karbi nunger maitsü, oshi aser sobaliba kümzüka ayutsü.
- # MoS ajanga temai adokba Karbi telungpurtem nem teyari agütsütsü.
- # Iba ajanga Assam sorkari Karbi Welfare Council ka tentetsü aser KAAC area adena orr aliba Karbi nunger asoshi inyaktsü.
- # Karbi Council nem senotsü agütsütsü atema Assam indang Consolidated Fund teimba akümtsü.
- # Centre sorkari taruba küm 5 tsüingda Karbi tesemtem renlokdaktüsütsü atema Rs. 1,000 crores agütsütsü nangzükogo.

Nagaland nung tesayur 34 nem State Level Teachers Award agütsü



Teachers Day nung State Level Teachers Award angurtem

Kohima, September 5, 2021 (TYO): Deobarnü Nagaland nung Teachers Day amongdang tesayur 34 nem State Level Teachers Award agütsüogo.

Nagaland nung shisaliokjenjang ajungketba nung bendanga agüja inyakba atema sorkar aser nija school tesayur 34 nem sempet agütsü.

COVID-19 wara ajanga yaküm Teachers Day memongtet aser iba jagi taküm küm ana indang state level award külemi agütsüogo.

Tanü State Level Teachers Award agizükertemji 2020 küm atema tesayur 13 aser 2021 atema 21 lir. Parnok nem senpet den kulikaket agütsü.

"Covid wara mapang tesayurtemi kanga meranga inyakba atema tenüingsang agütsür. Shisaliok wadang ya teti melenshir aser lesson den külemi sayuyim tensa den apet melenshia aoe. Tesayurtemi tanur dang tajungtiba sayutsü atema tensa melenshiba ama angazüksüla" ta School Education Advisor, K T Sukhalu-isa ashi.

Tanü alima wara ajanga shisaliok wadang nung temelenshi adokba sayuogo. Tesayurtem ama

asenoki iba temelenshi agizüka inyakba aotsü renemdi" ta paisa ashi.

Heads of Institutions aser tesayurtemi School Education, Nagaland Board of School Education aser SCERT den amalitep alitsüla aser parnoki tuyuba sülen anidaktüsüla, ta Advisor Sukhalu-isa ayongzük.

"National Education Policy 2020 ajanga inyakyim nung temelenshi aika alitsü anungji tesayurtemi item sülen anidaktüsüla aser education sector tajungba kümdaktüsüla. NEP 2020 kübok Foundational Literacy and Literacy Programme ji pre primary level asoshi temolung agütsütsüla" ta paisa metetdaktüsü.

Paisa tesayur ajak dang National Initiative for School Heads' and Teachers' Holistic Advancement (NISHTHA) kübok Capacity Building Programme nung shilem agütsü mepishia metetdaktüsü.

"Asenoki asen chirnur aser semchirtem asoshi tarutsü tajung agütsünüra, tanü asenoki tesayurtemi tajungba kümdaktüsüla" ta Sukhalu-isa ashi.

"Nenok ya kanga senti lir aser asen tarutsü nenoki yanger. Nenoki classrooms aser playground nung jembiba aser inyakba ajanga Nagaland aser lintik nung tarutsü putu dak kongshir" ta paisa shisem.

"Tesayurtem indang teblemetsü khuret ulura lir. Tesayurtem ya loktiliba asoshi tongtired lir aser nenoki kaketshirtem dak sempet aliba ajiteta parnok aniteter" ta special secretary Kevileno Angami-isa ashi.

Tesayurtem melira linük yangertem, ketdangsurtem doctor aser engineer tem malitsü, ta laisa ashi.

"Covid wara ajanga tesayurtem asoshi teblemetsü khuret tuluba bentsür aruogo. Anungji tesayurtemi mapang melenshiba sülen anidaka pei tajungtiba agi kaketshirtem anitetsü merangtsüla" ta Kevileno Angami-isa ayongzük.

Iba sentong nung mendenji Director Wonthungo Tsopoe liasü, Kohima Lotha Baptist Church Pastor Renthungo Kikon-i temoatsü meshia sarasadem aser additional director Razouseyi Vese-i anküp tepela o jembi.

COVID-19 Nagaland: 66 taneptsü angu & 54 dak putet

Kohima, September 5, 2021 (TYO): Deobarnü Nagaland nung COVID-19 agi shiranger nisung 66 taneptsü angu aser 54 dak putet. Tang tashi nung nisung 30,356 dak putetba nungi 28,084 taneptsü nguogo aser 626 süogo.

"Tesüiba ghonda 24 tsüingda nisung 54 dak COVID-19 aliba putet. Parnokji Mon nung 15, Kohima nung 13, Dimapur nung 11, Phek nung 6, Mokokchung nung 5, Wokha nung 3 aser Zunheboto nung 1 lir" ta Integrated Disease Surveillance Project atema State Nodal Officer, Dr Nyanthung Kikon-isa ashi.

"Kasa mapang COVID-19

puteta alir nisung 66 taneptsü angu. Parnokji Mokokchung nung 20, Dimapur o Wokha nung terpungugu (15), Kohima nung 10, Kiphire nung 4 aser Mon nung 2 lir" ta paisa ashi.

Nagaland nung COVID-19 nungi taneptsü angur 92.51% lir aser tang nisung 736 anepaludar, ta Dr Kikon-isa ashi.

"Tang tashi nung COVID-19 alitsü akok ta temolung melemba sample 339,900 tendangogo. RT-PCR ajanga 106,608, TrueNat ajanga 77,604 aser Rapid Antigen Test ajanga 146,688 tendang" Dr Kikon-isa metetdaktüsü.

"Honibar tashi nung nisung

660,726 nem COVID-19 vaccine indang dose 876,866 agütsüogo" ta State Immunization Officer, Dr Ritu Thurr-isa ashi.

"Vaccine agirtemji frontline workers 60,854, healthcare workers 15,992, arishi küm 45 ser temapur 193,510 aser arishi küm 18 nungi 44 tsüingda alir 390,370 lir" ta paisa ashi.

"Vaccine agirtem rongnungi nisung 216,140-i dose anaprong agiogo. Parnokji frontline workers 44,648, healthcare workers 12,970, arishi küm 45 ser temapur 116,300 aser arishi küm 18 nungi 44 tsüingda alir 42,222 lir" ta Dr Thurr-isa metetdaktüsü.

NE nungi tesayur 8-i National Teachers' Award nguogo

Guwahati, September 5, 2021 (Agencies): Linük nung Teachers' Day amongdang Northeast nungi tesayur 8 nem National Teachers' Award agütsüogo.

President Ram Nath Kovind-i linük nung tesayur 44 nem National Teachers' Award agütsü aser sempet angurtem rongnung Northeast kübok Assam o Sikkim nungi anana (2) aser Nagaland, Manipur, Mizoram o Tripura

nungi kaka (1) dena lir. Northeast nungi National Teachers' Award angurtem: Swedesunuo Zao, Head Teacher, GMS Jakhama, Nagaland; Ningmareo Shimray, Lecturer Ukhrul Higher Secondary School, Manipur; Prem Das Chhetri, Teacher Sir T N Sr. Sec. School, Gangtok, Sikkim; Mingma Sherpa, Head

Teacher, Lum Primary School, Sikkim; Jacinta Vanlalengzami, Head Teacher A and M Grandchild School, Mizoram; Sib Sankar Pal, Head Teacher Pandabpur High School, Tripura; Kangkan Kishor Dutta, Teacher Bamunpukhuri High School, Assam; Binanda Swargiary, Teacher K B Deulkuchi, H S School, Baksa, Assam.

Dzukou Valley nung mürekmejuba sentong agi



Dimapur, Rongjui/Sept. 05 (TYO): India Tourism Imphal, Ministry of Tourism, Government of India aser Pier Tours lungjemer Dzukou Valley nung September 03, 2021 nü awareness campaign aser mürekmejuba sentong ka agia liasü.

Iba sentong nung Youth Net aser Department of Planning and Coordination aser Directorate of Tourism, Government of Nagaland den Pier Tours, Kohima, Nagaland lungjemer tang tour guide training agütsüba nung adener arua shilem agia liasü.

Nisung 32 arua iba sentong nung shilem agi. Mürekmejuba sentong agiba sülen sentong

tatsüka agiba nung Nagaland Tourism, Government of Nagaland indang Brand Ambassador, Onen Nenty shisalen sayur ama shilem agia liasü.

Lai iba mapang tourism tsütsü temolung agütsütsü aser carbon ajemdaktsütsü indang jembia liasü.

"Dzukou Valley ya Nagaland aser North-East India nung trekking tesem tongtipang ka kumogo, kong tourist tem tali arur, talisa meyi mapang iba valley sünga naro apongba ajanga nüburtemi iba tesem semdangtsü janrar. Asenoki tangatetba tajung nung senzüsüla aser carbon amshiba ajemdaktsütsüla, aji asünung dang Dzukou aser Nagaland ya

tourism tsütsü tesem tongtipang akumtsü," ta Onen Nenty-i ayongzük.

"Asenok tour guides ama asenoki shilem tulu agütsüla. Dangartem asoshi asenok ya tatishitsü tajung aliba nisung kaka asütsüla, anungjidang asenok nungi parnoki shisatsü jenti angazüktsü."

Sentong nung adenertemi iba tesem memenentsü aser tour guide tajung kaka asütsü nangzuka anüngleni long kaka merepdoka liasü.

Pier Tours indang Founder, Kejaroko Pieru-i sentong nung adener, SAYO aser Dzukou Management dang iba sentong takok ngua agiba asoshi pelaba lemsatepa liasü.

Pei kisüng atema bilemba molungsentsü malitsüla: K. Therie

Dimapur, Rongjui/Sept. 05 (TYO): Tesayurtemi tamangba yimsü, social science aser science sayuba ajanga alima melenshiogo aser tejakleni renloka aor. Parnoki kaketshir indang molungsentsü nung milak jangrudaktsür aser ajungmesoa renlokaktsür. Parnoki bendanga agütsür inyakba aser par mapa atema pelaba lemsateper, ta K. Therie, NPCC tir sangdong ka ajanga ashi.

Reju ajak ya tesüiba, tang aser tarutsü indang sayutsü nükjidong nung lir. Ibai tesayur kisüng masü saka political party tem densema reju ajaki lenmang shidak nung sayua anitsü imlar,

ta pai ashi.

Pei kisüng aginüba ama inyaktsü ya tai lir. Lokti nung mashileni aoba ya tesayur tai masü saka reju aser tentet balalai pei atema bilemba tejangraba ataloktsü merangba ajanga lir. Parnoki ochi obendang, ajak kasa ama angatetba aser system amadoker 'Ni ano tali aginer' ta temolung nung jembiba ang peritsü meranger, ta K. Therie-i ashi.

Tanü iba anogo tulu nung ni nüburtem nem angatetdaktünübaji, ochimashi tenzükba tera tamajung ya angati sempet, angati sen aser angati chiyongtsü lir. Nisung shingaiia tatem maka angati

sempet magütsütettsü. Anungji kodang nisung timba angati sempet nung yimya süba aor, idangji 'Ni ano tali aginer' ta asüba molungsentsü arudaktsür, ta ashi.

Parnoki ken angati sempet agütsütsü aser küm pongu atema tax meshitsü.

Lokti tentet lenir aika sübokrem sempet amshir. Parnoki memeteti lokti nung parnok ya Nagaland nung sübokrem agirtem lir ta sangdonga jajar.

Tajung angatetba senso ajungai tamangba yimsü aser tzüzüing-ozüing nung aliba ama kechi shidak, aji sayutsüla, ta K. Therie-i ashi.

Security Forces pure Peren nung Teachers Day amung



Dimapur, Rongjui/Sept. 05 (TYO): HQ IGAR (North) kübok Assam Rifles, Jalukie Battalion ajanga Peren district nung September 5, 2021 nü Teachers Day munga liasü.

India indang taoba tir aser tashi temeteter Dr. Sarvapalli Radhakrishnan asoba anogo nung küm shia September 5 nü Teachers Day ya amunger.

Iba anogomung nung Assam Rifles temi district nung aliba

kaketshir aser lanurtem takum temaba jenjangi ajungketba nung tesayurtemi shilem agiba atema tushia liasü. Ajidang masü parnoki linük asoshi anibelem mesasai inyakba atema pelaba lemsatep.

Security Forces temi iba ama sentong ayongzükba atema district nung alirtemi pelaba lemsatepa liasü.

Maneni HQ IGAR (North) kübok Assam Rifles, Kiphire Battalion ajanga Sainik School

Punglwa nung azüngtsü shimteta aliba kaketshir nem tenüngsang agütsüba sentong ka Kiphire nung September 4, 2021 nü agia liasü.

Tarutsü nung district nungi pei nükjidong ataloktsü asoshi kaketshirtem ajungmesotsü tangatetba nung iba sentong ya ayongzük, kong Sainik School Punglwa nung azüngtsü asoshi district nungi shimteta aliba kaketshir asem den waiting list nung alir par pezü aser parnok tsürapurtem tushia liasü.

Iba sentong ung District administration, Kiphire nung aliba Primary aser Higher Secondary School nungi principlap tem aser kaketshir den tsürapurtem dena liasü.

District administration nungi Kiphire indang Deputy Commissioner, ADC, SP, Addl. SP, SDO aser DEO dena liasü.

ANCSU ajanga kija kentenba tetoktepba ayongzük

Dimapur, Rongjui/Sept. 05 (TYO): Kentenba tsütsü sempet aliba college student tem ajungmesotsü aser ajungkettsü mechi All Nagaland College Students' Union (ANCSU) ajanga TaFMA den lungjemer September 15, 2021 nü Virtual Solo Singing Competition ayongzüktsü.

Tetoktepba timi tendangogo ta shilem agir molung lemdaktsütsü nükjidong nung tendangtsü asoshi nüngtugu Director aser kentener asem jaoka lir, aser itemji:

1. Dr. Hovithal N. Sothu Project Director, Task Force for Music and Arts Government of Nagaland
2. Obed Kath, Songwriter, Composer, Founder and front man of the Christian Band DIVINE CONNECTION
3. Virie, Singer, Songwriter and Composer, Radio City

Freedom Award aser Music Award of Nagaland sempet angur.

Iba tetoktepba nung mezüngbuba jenjang nguteter nem sempet sen 15,000 den kuli kaket agütsütsü.

Tanabuba jenjang angur nem sempet sen 10,000 den kuli kaket aser tasembuba jenjang nguteter nem sempet sen 5,000 agütsütsü.

Iba tetoktepba osang ya ANCSU indang Instagram account ancsu_nagaland_official nung September 20, 2021 nü sangdongtsü aser takok angur indang ken ya YouTube channel ANCSU Nagaland nung upload asütsü.

Iba tetoktepba nung ANCSU nung affiliate süa aliba college ajungai shilem agitettsü. Iba tetoktepba nung shilem agitsü atema pei students council/union ajanga achayangtsü. College ka nungi nisung anati shilem agitettsü.

DC Dimapur ajanga Horticulture farm tem semdang



Deputy Commissioner, Dimapur, Rajesh Soundararajan, IAS-i September 4, 2021 nü Shitovi Village nung Dragon fruit farm semdang dang sterilized cutter amshia Dragon fruit tamen ka ongzükba mapang tangokba noksa ka yangi angur.

Dimapur, Rongjui/Sept. 05 (TYO): Deputy Commissioner, Dimapur, Rajesh Soundararajan IAS ajanga September 4, 2021 nü Shitovi village nung aliba Dragon fruit farm aser Vidima village nung aliba Integrated farm densema horticulture farm tem semdanga liasü.

Project Director DRDA Mon, Temjen-i yima aliba Dragon fruit farm semdangba sülen, tzüngsang-mopung den apet Nagaland nung Dragon fruit tsünüa amshitsü kanga ajungtsü, ta Deputy Commissioner, Dimapur-i ashi.

Aluyimer dang mozü mamshi dragon fruit tsünüa amshitsü asoshi lenmang sayuba atema pai kibur dang pelaba lemsatep. Iba süngjang nung nutritional aser medicinal value kanga lir.

District Horticulture Officer, Dimapur, Tamsu Longkumer-i Deputy Commissioner dang horticulture yimyattem aser dragon fruit tsünütsü yimtattem sayua liasü.

Vidima nung Rajesh

Soundararajan-i budding Integrated Farm ka semdanga liasü, kong ak metsüba aser ango tsübu dak alaka tesem tulu nung mamazü, somomo aser azüngken tsünüa lir. Iba Integrated Farm kibur ya Dr. John Murry'er jabaso Renbemo Murry (MBA) alitsü.

Taküm October ita tashinung hybrid lichi, Motiram aser Ramputan yoktsü, ta kiburi shia liasü.

Deputy Commissioner, Dimapur den sensaksemba mapang, aluyimer teloktem nem tim lenmang sayua anitettsü nüngdak, ta Dr. John Murry-i ashi.

Farming yimyattem tsüngtong oa angatettsü mechi school aser college students tem nem maongka agütsütsüla. Ali dangi memeyipra Naga nunger arosi tarutsü nükjia mali, ta Dr. Murry-i ashi.

Deputy Commissioner, Dimapur ya meina DHO Dimapur, Tamsu aser DPRO Dimapur, Lonalo Patton nungertem oa liasü.

Temeim Ojala Bilemteter



LEMDONGLA (AKHOYA) Tasüba anogo : September 06, 2019.

Ojala temeim ya tangsa tejangjaba meteter, Tanü Ojala meliaka ali ama, La temeim bilemtet dang onok mulung süneper. Ojalai menürema ola tanük agi teimla agüja jembibato, Onok asoshi tashi tasen angudak liasü. Ojalai anir kibong tekülem agiba bilemtet dang, Onok taküm nung Tsüngrem taochi tali jangjar. Lai mapa meranga inyakba bilemtet dang, Onok mulung tali ajungshir. Temeim, sarasadem aser meranga inyakbatemji, Ojalai toktsüba senmangtem lir. Item senmangtemji amangtetsüsa, Oh Tsüngrem, onok nem tashi kuama. Ojala den pilar tanü küm ana ajungba anogo, Ojala temi em bilemteta Tsüngrem nung sanga amonger.

- Temeim ki nungbo & ki nunger tem.

Mizoram Congress-i Health Minister R Lalthangliana mapa nungi agientsü akhanger

Aizawl, September 05, 2021 (Agencies): Mizoram Congress-i State Health Minister R Lalthangliana mapa nungi anentsütsü takhangba agütsüogo.

State nung Covid-19 wara maparen nung tamakok aludaksü ama temolung melemi bilemba atema Mizoram Congress-i Chief minister Zoramthanga dang health minister Dr R Lalthangliana melena "mapa kokteta inyaktsü" nübu tetemjen ka shimtsü asoshi mepishiogo.

"Tang yimsü süa aliba Mizo National Front (MNF) sorkari alima ajunga asungba COVID-19 wara anema raraba maparen dak sendakba nung tamakok aludaksü ama temolung melemi bilemer aser iba maparen tamakok aludaksüba ya health minister khuret lir" ta Congress otongdar aser party media chairman Dr Lallianchhunga-i ashi.

Mizoram kübok Lunglei jila nung RT-PCR laboratory ka amenoktsü dak sendakba nung memolungi liasü kechiyong yimtenren tsütsü repranger health minister-i iba maparen anema nokdak, ta Dr

Lallianchhunga-isa ashi. Tanga State ajak nung Covid-19 tensa takok ngua aziüoktetba mapang ka nung Mizoram nungi iba tashidak puteter timba timba dang kümdar. Item ajak ya health minister-i pa nem nungloktsüba mapa shitak meinyakba ajanga lir, koba ajanga State rongsenketzüng nunga kanga mejungi kongshiogo, ta pai ashi.

"Covid-19 dak sendakba maparen nung tamakok aludaksüba asoshi health minister dang iba khuret abentsü aser pa melen maparen kokteta bener aotsü nübu tetemjen kar shimtsü asoshi mepishir. Iba dak sendakba nung süoki yia bilemdangtsü asoshi chief minister danga mepishir aser Covid-19 agi timtemer ajangzüksü asoshi pa melen nübu tetemjen ka yakta shimtsü asoshi telemtetba agidaktsüner," ta Lallianchhunga-i ashi.

Congress lenniri ashiba agi, September 2 tashi RT-PCR facility ajanga Covid-19 atema tendangba sample tem Rapid Antigen Tests indang shilem 66.64 nungi shilem 27.30 dang liasü.

Sorkari Covid-19 tendangtsü atema Rapid Antigen Test dak

dang metaloker asünung RT-PCR test indang shilem kanga dang tajemba liasü, ta pai ashi.

Kasa mapang, state indang Covid-19 hospital Zoram Medical College (ZMC) aser state-run Covid-19 Care Centre tem nung Covid-19 agi shiranger 20,000 anepaluogo. Ano külen State kübok lokti tentet balalai achaayangba Community Covid-19 Care Centre tem nung Covid-19 agi shiranger 35,000 shi anepaluogo, ta pai ashi.

Lallianchhunga-i ashiba agi, State nung Sorkari achaayangba Covid-19 Care Centre 59 den medemdangra, Community Covid-19 Care Centre 249 shi lapoka lir.

State chief secretary Lalnunmawia Chuauango-i ashiba agi, Mizoram anüolen tip tsütsü district pezü nung Covid-19 tendangba maparen achaayangtsü atema Lunglei civil hospital nung RT-PCR laboratory amenoktsü asoshi sorkari asalentong yangludat.

Iba laboratory atema kisü-jensü maparen inyakdar aser azükba takdang (upper floor) merenemdang RT-PCR laboratory ya ground floor nung amenoktsü, ta pai ashi.

Honibarnü Union Home Minister Amit Shah-i New Delhi nung Olympic silver medallist Mirabai Chanu nem tenüngsang agütsüdang agiba noksa angur. Bureau of Police Research and Development (BPR&D) indang 51 buba Raising Day benjungmong nung Amit Shah-i Manipur tsür Mirabai Chanu nem tetushi agütsü. Manipur nungi weightlifter Mirabai-i Tokyo Olympics 2020 nung silver medal nguteta liasü. Arishi küm 27 tain Mirabai nem state sorkari Additional Superintendent of Police (ASP) mapa agütsüogo.



Karbi Anglong nung sen crore 8 alang heroin apu Guwahati, September 05, 2021

(Agencies): Temesepba mozü shibelenba aziüoktsü atema Assam police-i mapang shia mapa takok ngua inyaka arur.

Tang Assam tesem balala nung iba maparen kanga bulua inyakba mapang Deobarnü Assam kübok Karbi Anglong district nung police-i sen crore aika alangba temesepba mozü puogo.

Karbi Anglong nung police-i heroin seret 1 shi apu aser iba indang jenjangji sen crore 8 lir.

Karbi Anglong kübok Balijan Forest anasa police-i heroin ji apu.

September 1, 2021 nü Karbi Anglong kübok kasa tesem (Bokajan sub-division) nungsa police-i temesepba mozü jenti apu. Police-i iba mapang sen crore 4 alang heroin pua liasü.

AJP-i Tripura chuba jabaso Pradyot-i Assam semdangtsü

Guwahati, September 5, 2021 (Agencies): Lurinjyoti Gogoi-i aniba Assam Jatiya Parishad (AJP) Tripura chuba jabaso Pradyot Bikram Manikya Debbarma pelaa agizüksü atema renemer.

Pradyot Bikram Manikya Debbarma-i September 7, 2021 nü Assam semdangtsü sentong lir.

Pradyot ya taoba Tripura Congress president liasü aser tang Tipraha Indigenous Progressive Regional Alliance (T.I.P.R.A.) chairman lir.

Tripura Tribal Areas Autonomous District Council (TTAADC) elections nung takok tulu anguba sülen TIPRA ya Tripura nung political party tongti ka kümogo.

"Pradyot Debbarma pelashishia agizüksü atema



Pradyot Bikram (File photo)

party züngsemtemi kanga meranga mapa inyakdar" ta AJP president Lurinjyoti Gogoi-i ashi.

"Tripura chuba jabasoi semdangba ajanga Northeast longjemtsü asoshi lenmang lapoktsü" ta AJP general secretary aser taoba Assam minister Jagadish Bhuyan-ia ashi.



Arunachal Pradesh kübok Tirap District nung sepaitemi mozü shibelener ana apu. Osang tejangja ka angazükba nung ajemdaker sepaitemi State Police den külemi Laju nung mita aodang Rs 2, 25,000 alang opium (25 Thans) apu. Parnoki mozü shibeleneranaji Laju Police Station ket nung agütsüogo.

Assam nung tanü nungi shisaliok rejutem lapoktsü

Guwahati, September 05, 2021 (Agencies): Graduation course indang final semester; higher secondary final year aser post-graduation indang final semester atema offline class tem Hombar (06.09.2021) nungi tenzüksü.

Hombar nungi shishaliok rejutem lapokshitsü atema Assam sorkari SOPs (standard operating procedures) tasentem latettsüogo.

Assam sorkari latetba SOPs tasen ajanga angazükba agi class 11 tashi offline mode maneni shibangtsü.

Iba den bendenloksema, kaketshirtem shirnok offline class nung adentsü, parnoki (kaketshirtem) COVID vaccine indang mezüng dose bo agitsü

nüngdaker. Kasa mapang, kaketshirtem shirnok Hombar nungi class (offline mode) tenzüksütsü, parnok hostel nung alitsü asoshi melatsü ajisüaka parnoki Covid-19 vaccine tama agitsüla.

Ano class 12 nung azünger kaketshirtem class nung adentsü asoshi parnok arishi küm 18 tema asütsüla.

School aser College tem dang mapang ka nung aser classroom ka nung kaketshir 30 dang melatsü asoshi tetuyuba agütsüogo, ta kasa SOPs nung shia lir.

Maneni, Education Department-i class tilapur (lower class) tem tagidak aliba ama online class tem maneni agitsü asoshi tesayurtem dang tuyuogo.



TIR YIMYIM YIMOBILEM (EDITORIAL)

DIMAPUR TENTONÜ, RONGJUI(SEPTMBER) 06, 2021

Karbi nunger telongjem

Karbi Anglong nung küm aika parnoka India küboksa süaka yimten jenjang tajungba ka nung linüba agi tashiyim dena amshia raraa aruba sülen, yakanü New Delhi nung Assam Chief Minister dena lia India government den Karbi nunger telongpur telok pungo külemi tangatetba ka ser yimjung nung Karbi lima renloktsü asoshi tangatetep ken o renembaji Karbi nunger asoshi dang masü saka asenok Naga nungertem asoshia osang tajung ka lir. Karbi nunger telongpur telok pungoji Karbi Longri North Cachar Hills Liberation Front, People's Democratic Council of Karbi Anglong, United People's Liberation Army, Karbi People's Liberation Tigers aser Kuki Liberation Front nungertem liasü. Atangji, parnoki aginüba ama state balaka akümtsüsabo malangzüktet saka parnok telok pongo külem tangatetbaji Karbi Anglong tajungba renloka aotsü atema center den yimjung nung ken o tangatetep ka renemtsü rongdak nungdakbaji liasü. Item Karbi nunger telongpur teloktemi mapang mapang shia longkak aita Karbi Anglong mokdangba ajanga asenok Naga nungertema aiben timtem ajurua aruogo. Karbi nungertem ya teti asen kidanger asütsü, anungji par lima nung tesünep yimjung aliba agi asenok dena ajangzüksü. Aji oda, tanga Karbi Anglong kübok asenok Aor yimtsüung dena küma lir. Tang Karbi nunger telongpur telok pungo den center government-i yimjung ken o tangatetep yangluba nungji Karbi lima terenlok atema senotsü balaka lemzüksütsüba dang masü saka Karbi nunger sobaliba aser parnok oshi wazüka ayutsü asoshi sentong balala inyaka aotsü telemtetba agia lir. Item ajakji yutsür, Karbi nunger telongpur telok balala pungo tashi, Karbi nunger tejakleni odaktsütsü mechi, külemi ken o lemtetdak sabangi arutetba mapa nungji asenok Naga nungertema tangazüksü tongtibang ka lir. Karbi nunger telong nung alir telok pungoji telok ka küma melongjem saka parnok tangatetba nung dang longjemmer oagi India government den jembi, kechiyong telok balala süaka parnok nükjidongbo kasa dang, aji Karbi lima aser Karbi nunger ajungtsü asoshi dang liasü. Iba amaji asenok Naga nungertema Naga yimten temeten asoshi nokdakba tongpang nung, tia majung, telok aika küma lemsaadokogo, iba jagi balaka asenok tongpang nung tashi itta menokdaktetter. Ajisüaka, Naga nunger telok ajak nükjidongbo kasa, ibaji Naga nunger asoshi yimten jenjang tajungba ka lateta yutsütsü asoshi nokdaker. Iba nükjidong ataloktsü atema Naga nunger senti taküm aika agütsüogo aser Naga yimten temeten asoshi raraba mechi timtem, reshikangshi aser maksü majurudangba Naga nunger kibong kata malitsü. Alima nung nisunger yimya asünungji, aibenbo yimten nung nisung ajak telok tentet ka kübokbo melongjemtettsüa akok, saka iba jagi pei lima memeim aküm aser pei nübortem asoshi yimten temeten atema menokdaksü ta masü saka pei tetsü taso lima asoshi inyaksüba nükjidong nungibo mepilar. Iba tangatetba nung Karbi nunger amaji, telok tentet balala süaka pei lima aser pei nübortem asoshi tajung inyaksü atemabo ken o lemtetba sabangi külemi arutsüba shinga telokia menungnantgüla. Kasa pei tetsü taso lima aser kasa pei nübortem asoshi telok shia den ken o balala renemtsübaji tasak asütsü, anungji pei nübortem asoshi shitakba yimten ken o tatem kati aruagi latetnüba mulungsentsü lira, Naga nungertem rongnunga telok katia, katia pei jashiba aser temulung yirua aliba ajak toktsür, tarutsü Naga nunger lanu putu asoshi yimten jenjang tajung ka alanga yutsütsü tangatetba nung, Naga yimten ken o jembidak sabangi Naga nunger linük tenzükertem telok ajak külemi arutettsüla. Naga nunger telok balala lemsar alirtem dang temang ajak ka küma longjemtsü mashir saka tanüla nung aser tangatetba nung asenok Naga nunger ka küma longjemmer tarutsü Naga lima asoshi telemtetba tajung ka agitsü mapang tajungji tang ya asütsü.

OLEMSABANG

Otzü ya tembar tajungtiba?

~ S.Nuken Longkumer, Dimapur, Naga United

Ans: Alima nung otzü aika angutsü, jembir mejembima, zünger mezüngma lir! Shibai otzü bushir pai alima kümzüker aser nungtugo akümer! Yamaji osang kakat ya shisatsü agutsür lemanng tulutiba lir? anungji osang kakat ya bushia zügang Tir Yimyim ola angashir tepela balaka arur, yamaji asenok amang tia nung alidang 1872 küm Naga tenemi khristan yimsü aru! Iba sülenbo 1918-1919 nungibo World War mapang ajuruadok, ano tanabuba raraji 1939-44 World War II mapang liasü! II World War mapangbo Naga nungertem parnok 2000 shi tashi iba rara nung atenba otzü lir! joko asenoka tenük lapoker küm ishika lia arudang tangar lima inyakba ajiteter mapa balala inyaka aotsü tenzüker? Tanü Naga lima yabo narotsüki yangluteter alitsüba? 1964-2018 tashi reprangdangra Naga nunger dangi aruba rongsen ya million aika tzüim taroki yokadokba angutsü. Naga nunger rongsen paika aruba to shirnoki amshi, shibai yua lir, mesüra shibai chiadok, kari bendena ayu asü? yua malitsü kecha maka tagirbo shinga malitsü! Saka nenoki yangluba RCC temji lemanng yanglutsü sen ajak to yoka alitsü! tanü tashi Assam lima ajanga jajar? Ochishir Naga nunger tulur kar danga aliasü? Karbo alitsü südi! karbo shidakba takar lir meranga ochishia inyak! Tsünrem akümtsübur tulurtem, naia timtemer kar danga yaria lir asü? aikasa yariogo? Na leper kümpang tashi sensaker yaritsü nü khuret lir! nai yangluba nür ki nung jangratema arishia yutsütsü Tsüngrem o nung shiadokogo? Ochi agi alima aser kipong tempangtsü asüba agi zülutsür? Joko alima ya nür room telungi aruadoker! Tulur aser tilar ajaki alima rangben nung kechi inyaker angur metetadoker?? Joko alima nung memeteter shinga mali kümogo!! Tanü putu anüngtom nung jajateper, ita nung World Cup asayatsü ta lirji?? Joko tzüim tarok nung city yangluadoker! Asenoka kechi inyaksü renema lir?? asenok atemabo tsüklü ayimtsüba dak alema tanga tinyaktsü aika munguteter?? Asen lima nung aluyimer mali amai küma aor ama bilemer!! tsüklü ayimba samara koda asütsü ta tsüba repranger? Metsü nungi tenzüker chiongtsütem ajak tangar lima nungi inyakteter yokba dang chiteper?? Aji dang masü temang nempangtsü ajak tangari yangluba sobur?? Tereprangtsübo tulur amai lir saka asen aliba yimyattem angudangbo tangar kintemi süngmanga repranger!! Saka asen dangbo parnoki mashitsü!! Tanü tsüklü ayimba den ak, an, nashi amala ano aika lir, item mapa ya inyaka kipong mesütsü jenjang tajung aika lir! Govt. mapa bushidang mapang omatsü?? Anungji Hotel amala lapokang!! Iba ama mapaji lanur temi inyaksüla! Tanü putu takar aser tulurtem, Minister, MLA tem ajaki yaridaktsünür. Item ajak asoshi tebutijibo lemanng ya asütsü lemanng jungra asateptsü kecha mali?? lemanngji alima ajunga nung takartiba?? Iba sülen Kohima tashi Minsitertem bushia aikabo marutsü!! Car para mesüra sen memeshitsü nenok aonung junga mejangtsü? Tatem nung Naga nungertem aika mapa angutsü yoaseta aliba mapang mill tapu aika sama Industry aika anenadok!! Asen chirtem mapa bushir zünger mezüngma nüktsü yima kidang mena lir?? Dimapru yimti amala RCC yangluba jagibo meperitsü, majungtsü??

NARO TSÜKI

~ C. Lima Ozüküm Mongsenyimti

Masazüktetba naro tsüki ka
Tepang agi atishia meshitet
Meyirjangsa aika pakzüteper
Tenüki mayimjemtet iba tsüki
Azüng dalen shinü yimzür ama
Menürem jak tener nisungtem
Lanuwa nübojung den saku
Lula-a aoer shinga mali
Tenük amoshi shia
Sentsü melenjen melener
Anü lugo ta jimbitsü maka.

Azüklen mesoketa reprangtang
Anüng langpang ka tang küma atok
Wajak nung wangshisang chuba amen
Oli aruli ken tena longsolep
Ninang mochitzü ayim ayong nung
Naro küma pongtet süngotu
Tesanem keta aon mopungi
Sensopurtem sak ali nungi
Atasabai ashi
Temeshipur atenshidak
Aong metangtoka parnok pelatep.

Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Myanmar sepaitemi yimsüsüba kübok Arogotem timtemer

September 05, 2021: Taküm küm tetenzüklen Myanmar linük nung sepaitemi democracy lenirtem apuba sülen küm ka emergency sangdonga sepaitemi yimsüsüba ajanga iba linük nung Khristan million 4.4 shi timtemdar.

Tang Myanmar nung, talisa Chin state nung sepaitemi Tenla kitem aser Khristan kiojentem raksatsür. Myanmar sepaitem aser sepa yimsüsüba anema nokdakertem tsüngda rara tesashiba akümba sülen sepaitem kanga takoksa angur, ibayongji sepaitem mangyanga Khristanem meyong Tenla ki aser kiojentem raksatsür, ta osang ka ajanga metetdaksü.

August ita tom nungi tenzüka sepaitemi Mindat jila kübok yimsüsüba amaker, ta sepa yimsüsüba anema nokdakba telok- Mindat People's Administration team-i metetdaksü.

August 30 nüa sepaitemi Chat yimdak Tenla ki ka raksatsü.

Sepaitemi Tenla kitem dang masü saka nüburttem gari aser ki aika raksatsüba dang masü

saka nüburttem dang nungi auyar, ta kasa osang ajanga metetdaksü.

Chin state nung pastor kati, "Tenla kitem aser monasteries ama temeshi kiojentem meraksatsüsüla. Ibaji ajanga tamangertem melung yirutsür," ta metetdaksü.

Mindat People's Administration nungi otongdar kati, Tenla kitem raksatsürtemji Myanmar military's 101st aser 11th Light Infantry Divisions (LIDs) sepaitem lir, ta metetdaksü.

Tamalen Open Doors local partner, Brother Lwin-i, "Sepaitemi yimsüsüba tetezü, nütsüng timbai amangba tamangba yimsü nem tashi tali agütsür. Tesüiba mapangtem nunga sepaitemi yimsüsüba Buddhist yimsü aser sobaliba kümzüka aruogo. Tang iba tatalokba ajanga Arogo mejungi kongshitsü. Ano maneni Arogo anema tenokdangbatem benoktsü, ajisüaka tang tashi nungbo koma südir mejangja," ta metetdakja liasü. Tang itemji atangji ataloker.

Myanmar nung Buddhist

nationalism kanga tashi itta lir aser ibaji ajanga Khristanem aser tanga tamangba yimsü den minority tem reshikangshir. Myanmar nung Buddhist yimsü amanger nütsüng timba lir, aser linük nung Khristanembo 'second class citizens' ama züngshir.

Iba linük nung tamangba yimsü nung ajemdaker reshikangshiba ajanga Rohingya nung, Muslim nung aser Khristanem million aika kidanger linük-Bangladesh-i jena aoba sülen tang Cox's Bazaar refugee camp nung jenoka lidar.

Alima nung civil war mapang talangtibaji Myanmar nung liasü (1948 küm tenzü). Ibaji ajanga Khristan nütsüng timba aliba Kachin, Karen aser Shan state tem mejungi kongshia liasü. Myanmar nung telungpurtem aser sepaitem napronglai Khristanem reshikangshir.

Coronavirus wara ajanga linük nung Khristan aika sensak tia nung aliba mapang ka nung tang sepaitemi yimsüsüba ajanga Khristanem timtem tali bendenloker.

ANO GO ABEN TSÜNGREM DEN

Tenzüktsü anunger

Ne nüburi na raraba anogo nung peisasa mulungteta adoktsü. T.Ken 110:3

Asentenshiba tamaitü kaji, koba mapang nung Tsüngrem ain nung Pa nüburt dangi arur pa tenzüka mapa nung parnok taküm agütsütsü anungbaji lir. Arogo aika nung Tsüngrem mapa nung bendanga agütsür nüburt agi anünga lir. Pa talangzüka mapa nung yaritepa inyaksü temulunger nüburt mangur. Tsüngrem tenangzüka mapa mangashir aika dang lir aser Khristanem item mission wadang jagi aotsü ayimtener. Asenoki nungdakbaji temulunger aika adoktsü mepishitsüba masü saka Tsüngrem ain yokang ta mepishitsüba lir. Kodang Tsüngrem Pa ain nung nüburt dangi arudir pa mapa asoshi temulunger nüburt aser teyari agi anünga malitsü!

Tanü Khristan aikati aser arogo aika nung missionji mezüngbuba mekümdaktsür. Ibai kechiba süra asenoki asen ajaba lemangji samadok. Asenoki kotaki aotsü temsüa akümtsü atema dangbo mekümsük. Tsüngremi asenok samaa aliba lima kümzüksü asoshi Pa den külemi inyaksü asoshi kümzüksü. Asenok Pa den tesendaktep akaba ajanga Pa mission asenoki inyaksü akok.

Tsüngrem ain ajanga dang asenok pei atema dang bilemba nungi anitettsü akok aser mission tsütsüi meyipdaktsütsü akok. Parnok aruba lenmangji ibaji dang lir. Pa ain asenok ajanga sayutsü asoshi asenok dak tagizükba temulungjang akatsü nungdaker. Isaia den, "Ni yangi lir, ni yokang!" ta shitettsüsa ne mulungjang Tsüngrem meimba agi sünga lir ma ?

Tim Tebow-i Samaritan's Purse den senteper Afghan nunger yarir

Rongjui/September 05, 2021: Afghanistan nungi jena aruba Khristanem densema minorities yaritsü atema saisaponger nungtugu, Tim Tebow-i Samaritan's Purse aser Billy Graham'er semchir, Edward Graham den longjema liasü.

US sepaitem Afghanistan nungi ainshiba sülen nungi tenzüka Khristan organization balalai Afghan nunger Khristanem aser minorities yaria arudar aser Samaritan's Purse-ia maneni kümzüksüba maparen inyakdar.

Alima tesem ajungalen temeim mapa inyakba telok Samaritan's Purse-i tayimtsü ajanga relief belena Afghanistan nungi anir arurtem nem agütsür.

Samaritan's Purse-i Afghanistan nung aliba organization balala den longjemer Afghanistan linük nungi tanur aser tetsürtem densema nisung aika kümzüksü. Iba ministry indang partner katibo anogo ka kija nung tayimtsü asembe senzüa nisung 700 shi kümzüksü.

Osangbener den jembidang Samaritan's Purse nung inyaker kati, "Onoki tayimtsü sponsor süa nisung noklang aika kümzüksü," ta metetdaksü.

"Onok indang DC-8 cargo tayimtsü nung Disaster Assistance Response Team (DART) züngsemtem den hygiene kits aser medical kits belena shirangertem aser timtemertem yaridar," ta paisa metetdaksü.



Samaritan's Purse indang tayimtsü anasa parnok indang Disaster Response Team (DART) aser medical team tangokba noksa nung angur.

Nungtugu sayutsüngir, asür Billy Graham'er jabaso aser Samaritan's Purse Tir aser CEO, Franklin Graham-i social media ajanga parnoki Afghanistan nung kümzüksüba noksatem lemsatep.

Franklin Graham'er jabaso, Edward Graham aser Tebow nata Samaritan's Purse tayimtsü nung oa teyari agütsüba maparen nung yaritepa liasü.

Franklin Graham-i Instagram ajanga, onoki nisung meyirjang aika nem relief supplies teyari agütsüogo, ta metetdaksü.

"Inyakyim melenshir aser Afghanistan nungi apusoa aotsüpurtem suitcase ka danga

abentsü memela. Tesem ka nungbo ozü medical team kati C-section ajanga tanur ka sotsüogo," ta paisa metetdaksü.

"Tim ajanga nisung aika ajungmesoa liasü. Tang ama tensa ka nung onok den yaritepa atema sepaitem dang pelar. Tarutsü anogotem nunga onoki maneni inyaksü," ta paisa metetdaksü.

Afghan refugee tem yaritsü atema Tebow-i memetetba tesem kati oa liasü iba sülen pai Instagram ajanga tang alima tensa indang tebilemtsü lemsatep.

Tebow-i, "Afghanistan tensa atema onok melung raksar, sepaitem aser tetsürtem

densema nisung aika samaba atema onok melung raksar. Tang alima nung timtem tekangshi jenti lir, anungji onok den longjemer sarasademtsü atema onoki mepishir. Afghanistan linük atema sarasademjang, refugees atema sarasademjang, Louisiana aser Mississippi nung yipru agi kongshiba kibongtem atema sarasademjang, TN nung tzümetsüng, anüolen mi lendong aser coronavirus wara atema sarasademjang," ta paisa metetdaksü.

Tebow indang Tim Tebow Foundation-i tang ama tensa mapang nung Khrista ajanga teimla agütsür aser

amangbapurttem dang lenmang sayur.

"Tang tayongzüksüba jenti aliba mapang ka nung Khrista temang ka ama asenoki timtemertem yaritsü atema maangka aika lir," ta pai metetdaksü.

"Tammang nung Yisu tesangwaji tesangwaba. Asenoki timtem balala atema sarasademba mapang nung asenoki timtemertem tenzüksü atema lenmang balala bushidi aser tangar taküm ka nung temelenshi bener arutsütsü atema Tsüngremi asenok ajadang asenok renema lidi," ta paisa ayongzüksü.

Tebow-i Rome 12:21 lai nung ajemdaker, Laishibai asenok dang temenen nem mekokdaktsüsüla saka tajung agi temenen madak takok angutsü tuyur, ta ashi.

"Tang ama tensa ka nung asenoki nokdaktsüla. Asenoki maneni sarasademdi aser nungdakpbapurttem longjemer tenzüksü. Sentsüwangshi ajak Tsüngrem meyong süang. Onoki nenok asoshi sarasademtsür," ta pai lemsatep.

Edward Graham-i, "Volunteers aser sepaitem ajanga ni kanga ajungmesoa liasü. Temeimtsü taküm Afghanistan nung Taliban dang nungi ajenba ni nguogo. Timtem aika ajangshio saka timtemertem yaritsü atema America-i inyaksü. Sepaitem aser parnok kibongtem ajanga nüma atanger," ta metetdaksü.

OLONG PAITEP # 5928

1		2			3		4			5
				6		7				
8										
						9				
			10							
11										12
					13			14		
15										
16								17		

TIPIEN		LANGTSÜNGLEN	
1. Nüji masü - (4)		1. Jila tulu - (5)	
3. Technütsüka - (6)		2. Sarasademdang tembang - (4)	
7. Aketa shirangba - (5)		4. Tarutsü indang ashirtem - (6)	
8. Pi - (6)		5. Alia - (5)	
9. Amena - (5)		6. Mojing - (5)	
10. Kinü - (5)		9. Tai inyakba metet - (5)	
11. Tanang masü - (5)		10. Medemer chijiba - (6)	
13. Lenmang - (6)		11. Tatokba / Amadok - (5)	
15. Nübo tedi - (5)		12. Anüngdang masü - (5)	
16. Tuoshi - (6)		14. Jabaso masü - (4)	
17. Shiruru apuba temenatsü - (4)			

OLONG PAITEP # 5927 TELANGZÜBA

TIPIEN :	LANGTSÜNGLEN :
1. Tesangra, 5. Mungo, 7. Kisen,	1. Temesen, 2. Raksa, 3. Aon, 4. Aso,
8. Salem, 12. Semki, 14. Kilem,	6. Nile, 9. Alizüng, 10. Omen,
15. Kensü, 16. Sangpang.	11. Lemta, 13. Ola, 14. Kin.

ALOKBA O WARAKLA NA TARUTSÜ ATEMA SHISADANGER :



Alokba : Tantsü, ni ya ajungbena asünung na tanaben kibong kümshitsüa ma?

Warakla : Aya Tambu, kechi o jembir? Na asünungbo nibo künu Narola den ang alitsü ati. Kwa, süra ni yaa ajungbena süra naia koma süla?

Alokba : Nia na amajidang kecha mebenjai nenu Narola den dang lidija na?

Warakla : Oh Alokba!!

Lilir : WhatsApp

TANÜBO NAI LANGZÜANG

Q. Koba küm Darjeeling Himalayan Railway lapok?
 A.1889 B.1881 C.1990 D.1980

————— (Taruba adok nung onoki langzüsü)

YASHI ADOK TELANGZÜBA : Kerala

AO OSHI ANGAZÜKDAK:

TANÜ ANGAZÜKTSÜBA OJANG



Kusümong

(adv) kujang tetka, kanga tilaka (iota)

* Yimsüsürtemi inyakbaji nübortemibo **kusümonga** memetet.

Kusünok

(n) ku ongdokba oset (razor)

* Ku mejepdak **kusünok** mozü tzü agi shidoker amshitsüla.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :

NAI-A YA METETTER MA?

2000 KÜM NUNGI FOOTBALL NUNG RED CARD TIMBA ANGUR ASAYARTEM:

1. Sergio Ramos - 26	14. Jermaine Jones - 14
2. Rafael Marquez - 21	15. Alexis - 14
3. Felipe Melo - 20	16. Zlatan Ibrahimovic - 13
4. Matteo Contini - 20	17. Daniele Conti - 13
5. Fernando Amorebieta - 19	18. Emre Belozoglu - 13
6. Gerardo Torrado - 18	19. Cosmin Moti - 13
7. Gary Medel - 18	20. Leonardo Ponzio - 13
8. Deividias Semberas - 17	21. Alessandro Lucarelli - 13
9. Gonzalo Rodriguez - 17	22. Filippo Porcari - 13
10. Philippe Mexes - 16	23. Dani Alves - 12
11. Alberto Lopo - 15	24. Javier Mascherano - 12
12. Giampiero Pinzi - 14	25. Pepe - 12
13. Ricardo Quaresma - 14	

SUDOKU # 5969

TELANGZUBA # 5968

	8			3	5	2			4	7	8	9	2	6	3	1	5
	1			9			8		1	3	2	4	5	8	6	7	9
	7	4				1			6	5	9	1	3	7	8	2	4
7	4				1	3	2		7	6	1	5	8	3	4	9	2
9					2	8		4	9	4	3	6	1	2	5	8	7
	6						5	9	8	2	5	7	4	9	1	6	3
4	2						7	1	2	9	4	3	6	1	7	5	8
3				5	2	7		6	5	8	6	2	7	4	9	3	1
8					1				3	1	7	8	9	5	2	4	6

OJANG LUTEP # 5514

APMA :

BAKOBA :

SHAKIT :

TSASÜÜ :

AT :

TAMRAA :

ANALIDG :

CHKEA :

SÜMETET :

SÜKTSIDAÜ :

OJANG LUTEP TELANGZÜBA # 5513

ALIMA DANG JUNGRA ASENI MAPANG INDOKA INYAKBA MAPAREN AMAJOK MAKÜMITSÜ

TAN HOPTA ATEMA - KOMA SÜLA ?

Q. Nagaland angh R.N. Ravi ya melen nunga koma süla ?

Kerala nung ano nisung ana dak Nipah virus putetogo



September 05, 2021 nü Kozhikode (Kerala) nung Health workers-i Nipah virus agi asür ka tasü mang remtsüba noksa nung angur.

Kozhikode, September 05 (Agencies): Amongnü Kerala Health Minister, Veena George-i, Kozhikode nung Nipah virus agi shiranger arrshi küm 12 tanur ka asüba sülen ano nisung ana dak iba tashidak putetogo, ta metetdaksü.

"Ano nisung ana dak Nipah virus putetogo. Asür arrshi küm 12 den high risk contacts rongnung nisung anaji densema liasü," ta Health Minister-i metetdaksü. Nipah virus dak sendakba

nung senden ka amenba sülen osangbenertem den jembidang health minister-i, "Tang tashi nung onoki contacts 188 jangaogo. Surveillance team-i parnok 20 bo high-risk contacts ta shiogo. High-risk contacts rongnung nisung ana dak iba tashidak putet. Tenapronglaji health workers lir. Ka nija hospital nung inyaker aser ka Kozhikode Medical College hospital nung inyaker," ta metetdaksü.

High-risk contacts 20 pronglaji nikongdang tashi

nung Kozhikode Medical College-i anir aotsü aser asür den contacts ajak dang tangar dang nungi pilar alitsü tuyuogo.

Nipah virus agi asüsang indang samples ji Pune National Institute of Virology nung tendangba ajanga Nipah virus aliba puteta liasü. Central sorkari team ka state nung aliba National Centre for Disease Control dangi yokogo aser Amongnü aonung tashi nungbo atongtsü.

Central team jagi state nem technical teyari agütsüsü.

Tir Ram Nath Kovind-i tesayur 44 nem National Awards agütsü

New Delhi, September 05 (Agencies): Tesayurtem anogomong nung linük Tir, Ram Nath Kovind-i tesayur 44 nem National Awards agütsüogo.

Coronavirus wara aliba ajanga iba sentong ya online ajangadang agia liasü. Iba sentong nung jembidang pai, tarutsü putuji tesayurtem ket nung kümzüka lir, ta ashi.

"Ni tesayur ajak nem tenüsang agütsür. Item ama tesayurtem aliba ajanga tarutsü putuji tesayurtem ket nung kümzüka lir ta ni amanger," ta pai ashi.

"Tesayurtem anogo ya Dr Radhakrishnan nungtem nung amonger, ta asenoki meteta lir.

Pa ya shisashir ka liasü ta alimai meteta lir. Pa ya tesayur ka liasü, ta pai pa bilemtetdaksünüa liasü. Pa tesayur tajung ka liasü, ta pai tatishitsü tajung yutsüogo," ta pai ashi.

Joint Secretary, Ministry of Education RC Meena-i tamalen sangdongba ama linük Tiri Kargil nungi densema tesayurtem nem National Awards agütsü.

National Awards angurtemji Mamta Paliwal (GGSSS Bhiwani, Haryana), Kamal Kishore Sharma (Government Senior Secondary School, Kandaghat, Himachal Pradesh), Jagtar Singh (Government Primary School, Khamano,

Fatehgarh Sahib, Punjab), Sanjeev Kumar Sharma, (Government Primary School, Reasi, Jammu and Kashmir) aser Muhammad Ali (Government Middle School, Kargil, Ladakh) nung lir.

Yaküm-a Tiri tesayurtem anogomong nung tesayur 47 nem National Awards agüja liasü.

India nung tesayurtem anogo ya küm shia September 5 nü Dr Sarvepalli Radhakrishnan asoba anogomong nung amonger. Pa ya nungtugu shisashir ka liasü. Pai Bharat Ratna angu aser linük nüchiso anguba sülen mezüngbuba tatong Tir inyaksangji pa liasü.

Prashant-i Congress asentenshitsu atema inyaksür: Veerappa Moily

New Delhi, Rongjui/September 05 (Agencies): Congress lenir tain aser taoba mapang Union Minister, Veerappa Moily-i, Prashant Kishor-i Congress party asentenshitsu atema inyaksür, ta metetdaksü.

Prashant ya election atema asalentong yanglutsür mongin ka lir, aser tawa West Bengal election nunga pa ajanga Trinamool Congress-i takok ngua liasü.

Tang Punjab, Chhattisgarh aser Rajasthan state tem nung Congress telung nung mangatetep aliba dak sendakba nung tasüngdangba ka langzüdang Moily-i, "Congress ya tashi tait party ka lir aser lenirtem rongnung tangatetba balala alibaji tim dang. Anungji mapang shia item ama mangatetep ajak angatetep. Tashi agüja aliba lenirtemi party nung inyakertem den liromedema alitsüla. Party ajak nung telung nung mangatetep adoker, ajisüka ibaji ajanga party mekongshir. Punjab, Chhattisgarh aser Rajasthan state tem nung pei tangatetba lemsateptsü atema lenir ajak nem maongka agütsü. Bangdak lenirtemi item states nung mangatetep ajak bentetsü merangdar," ta metetdaksü. Sangküm Punjab assembly

election aser lenisüba menden raktepba dak sendakba nung pai, "Punjab nung party nung melung masürtem teblemtsü bentetdar. Lenirtemi MLA, minister aser ajak den jembidar. Onoki democratic inyakyim benshir, aser iba dak sendakba nung Navjot Singh Sidhu party Tir shim, anungji pai sorkar aser chief minister Amrinder Singh den angatetepa inyaksüla," ta metetdaksü.

Opposition party tem telongjem aser iba nungji Congress teinyaksü shilem dak sendakba nung pai, "Opposition Party tem amalitepa inyakba nung Congress-i tongti shilem agir. Gandhi (Sonia)-i achaayanga party ajak senden nung Mamata Banerjee aser Sharat Pawar ama lenirtema denogo. SP aser BS dak alaka opposition party ajak item senden nung denogo," ta metetdaksü.

Prashant Kishor dak sendakba nung pai, "Prashant Kishor-i party den yakyaka inyakdar aser pai mapa tajung inyakdar. Taruba assembly elections aser 2024 küm General elections atema Congress asentenshitsu atema pai inyaker. Telemenshi adoktsü atema pai merangdar," ta metetdaksü. Congress nung adentsü tebilemba lir," ta metetdaksü.

UP aser Uttarakhand nung aluyimertemi BJP anema nübo ayimtsü



September 05, 2021 nü Muzaffarnagar (Uttar Pradesh) nung aluyimertem 'Kisan Mahapanchayat' senden nung adenba sülen senshiba noksa nung angur.

New Delhi, September 05 (Agencies): Amongnü Uttar Pradesh aser kidanger states nungi aluyimer meyrjang aika Muzaffarnagar nung adenshia 'Kisan mahapanchayat' senden nung aden; iba senden ya Samyukt Kisan Morcha (SKM)-i ayongzük.

Aluyimertemi Centre sorkari benokba ozüng taseñ asem anema longkak aiter. Wara aliba ajanga parnoki longkak aiter tera süngjema liasü saka parnoki maneni longkak tesashiba aittsü. Sangküm Uttar Pradesh densema state kar nung assembly election agitsü lia aluyimertemi longkak tesashiba aittsü.

Muzaffarnagar nung senden amenba mapang nung aluyimertemi September 27 nü 'Bharat Bandh' agitsü lemtetogo. Iba jakdang linük

tesem ajaklen aluyimertem senden balala ayongzüka amentsü, ta aluyimertem lenir, Rakesh Tikait-i metetdaksü.

Aluyimertemi Uttar Pradesh aser Uttarakhand assembly election mapang nung BJP anema nübo ayimtsü, ta telemtetba agiogo.

SKM-i sangdong ka ajanga, "Mahapanchayat ajanga Modi aser Yogi-i aniba sorkartemi aluyimertem, alu nung aayangertem aser aluyimer pusemertem indang tashi jangjatsü," ta metetdaksü.

Amongnü BJP MP, Varun Gandhi-ibo, aluyimba ozüng asem anema mapang talangka nungi longkak aiter aluyimertemi asen shi aser azü lir, anungji telemtetba tajung agitettsü atema sorkari aluyimertem den ken o jembitsüla, ta shiogo.



September 05, 2021 nü Patna nung tesayurtem anogomong nung Bihar Secondary Teachers Eligibility Test (BSTET) qualified candidate temi parnok nem mapa agüjang ta takhangba agüja longkak aiter noksa nung angur.

Panjshir nung Taliban züngsem 600 shi tepsetogo

Kabul, Rongjui/September 5 (Agencies): Afghanistan kübok Panjshir province nung Taliban sepai 600 shi tepsetogo, ta Afghan resistance forces-i ashi. Afghanistan nung iba province kija ya Taliban-i matsüngi lir aser tang iba tesem atsüngtsü atema raradar.

"Panjshir nung anepdang nungi District balala nung Taliban sepai 600 shi tepsetogo. Taliban sepai 1000 dak tema pua lir mesera peisasa bendanga agütsüogo," ta resistance forces' otongdar Fahim Dashti-i tweet asü. Paisa, Taliba pur tanga province nungi supply bener aruba nung tetsükdaksü adoker lir, ta ashi.

Panjshir ya National Resistance Front of Afghanistan tamendakdak lir. Iba telok ya ex-Afghan guerrilla commander Ahmad Shah

Massoud'er jabaso Ahmad Massoud aser acting President Amrullah Saleh nati anir inyaksangshidar. 1996 nungi 2001 tashi yimsü asüba mapang nunga Taliban-i iba valley matsüngteti liasü.

Telok anapronglai Panjshir nung parnok jenjang tajungba aliba indang osang agüjaka iba ji shidak ta sayutsü atema kuli kecha mali. Al Jazeera sangdong ka ajanga, Taliban lenir kati ashiba agi, Panjshir nung maneni raradar aser parnoki Khinj aser Unabah districts atsüngogo, ta metetdaksü. "Mujahideen (Taliban fighters) pur province teyongtsü leni odar," ta pai tweet asü.

National Resistance Front of Afghanistan-i ashiba agi, parnoki Khawak pass nung kiralongrar aika meketbanga lir aser Taliban puri Dashte

Rewak tesem nung gari aser hadirtem toktsü jenshiogo. Dashti-i, iba tesem nung maneni raradar ta ashi aser Massoud-ia Facebook post ka nung Panjshir maneni tashi ita nokdakdar ta metetdaksü.

Ajisüaka Saleh shiba Massoud den külemi Panjshir nung lir, pai resistance forces jenjang mejungi lir ta shiogo. "Tensa kanga majung aser onok maneni makdar. Onoki takok tashi nokdangdar aser maneni nokdaksü," ta Saleh-i ashi.

Kasa mapang nung US general kati Taliban-i Afghanistan mazüoktetra civil war adoktsü ta tekümdangtsü metetdaksüogo.

Paisa, Taliban-i linük mazüoktetra küm asem tsüngda Qaeda mesera ISIS aser tanga kiralongrar telok aika tanaben poktettsü ta ashi.

England nung vaccine passports amshi tenzüktsü

London, Rongjui/Sept. 05 (Agencies): England nung aliba nightclubs aser kilung nung danga sentongtem nung vaccine passports amshitsü sentong aliba ama tan ita nungi inyaksü, ta vaccine minister-i shiogo.

Iba kulikaket ya amshitsü tang mapang shidak lir, kechiaser arishi küm 18 tema alir ajak September ita tatem tashinung mozü dose anaprong agitsü maongka agüja lir, ta Nadhim Zahawi-i ashi.

Nüburtemi COVID-19 mozü agiba kuli sayutsüba sentong ya tesem kar aser MP temi aija liasü.

Saka iba ya ajanga economy lapoktsü, ta Zahawi-i ashi. "Ni angatetba aser asenoki angatetba nungbo item industry lapoka alitsü atema industry den inyaksüla," ta pai osangbener dang ashi.

"Lokti tulu adenshiba, talisa kilung nung virus ya tali temelaba nung menashia aor ta asenoki angatetogo," ta vaccine minister-i ashi.

Pai Premier League football club temi amshiba tatishitsü amshia liasü, kong iba asaya sapurtem dang taoba ita nungi parnok mozü agiba kuli sayuba sülen stadium telungi aittsü melar.

"Kuli balala nungi tejangja

sayuteta lia industry shibangli-lapokli, shibangli-lapoki ta mesünera, September tatami vaccine passport ya benoktsüla, kechiaser iba mapang arishi küm 18 nungi tema ajak mozü dose anaprong agir alitsü," ta Zahawi-i ashi.

Scotland nunga ita tatemlen nungi nightclub aser danga sentong tulutem nung adentsü asoshi vaccine passport nungdaksü, ta tan hopta sangdongogo.

Arishi küm 12 nungi 15 tsüngta alir ajunga nem COVID-19 mozü agütsütsü indang jembiba mapang, UK indang chief medical officer-i mozü agi tajungba ta shira yamaji inyaksüji tim lir, ta pai ashi.

Joint Committee on Vaccination and Immunisation (JCVI) ajanga tang magi alirtem nem mozü agidaksütsü atema mashitsü ta lemtetogo, kechiaser health tsütsü mozü agi tajangzük agütsüba kangabo mali, ta ashir. Parnoki chief medical officer tem nem iba telemtetba agitsü mapa nungloktsü.

Honibarnü UK nung coronavirus cases 37,578 liasü aser iba tashidak puteter anogo 28 tsüngta nisung asüba 120 liasü.

Islamic State teloki Iraq police 13 tepset

Baghdad, Rongjui/September 5 (Agencies): Deobarnü anepdang Islamic State teloki checkpoint ka amakba sülen Iraq nung police 13 tepsetogo, ta security aser medical source balala ajanga metetdaksü.

Kirkuk yimti nungi kilometer 65 shi pila Al-Rashad temeket nung amenoka aliba checkpoint ka anepdang züngia lia amak, ta Iraqi police ketdangsur kati AFP dang ashi.

"Islamic State teloki federal police checkpoint ka amak," ta ketdangsur i ashi.

"Iba lendong nung nisung 13 asü aser asem yirua liasü," ta paisa ashi.

Kirkuk nung amenoker aliba medical source katia nisung

asüba osang jangjatsüogo.

Tang tashi nung iba lendong bener arutsüba indang telok kati danga nangzuka mali.

2014 küm IS teloki Iraq kübok tesemkar amokbanga ao ajisüaka US-i aniba sepaitemi parnok atsüngtok.

Iraq sorkari 2017 küm tatemlen iba Sunni extremists telok atsüngtokba sangdongogo, ajisüaka parnok maneni inyaksangshidar aser parnoki mapang shia security forces tem maka arudar.

Jihadist cell temi Iraq anütoktiplen mapanshia Iraqi army aser police maka arudar aser Deobarnü tatalokba ya taküm lendong tulutiba rongnung ka asütsü.

July 19 nü Sadr yimti kübok Al-Woheilat shishilembadak nisung 30 tepseta liasü, koba IS ketdangsurtemi parnok mapa ta nangzükogo.

Iraq nung International coalition troops 3,500 shi lir aser sepaitem rongnung US sepai 2,500 lir.

Taoba Deobarnü France tir Emmanuel Macron-i Iraqi Kurdistan semdanga Iraq aser Syria naprongla nung IS pur temai adokba tebilemstü lemsatepogo.

Paisa, America-i kechi telemtetba agidir agiang, international coalition nung shilem ka ama Iraq nung amenoka aliba France nung sepaitem maneni inyaksangshitsü ta shiogo.

Southwest Pakistan bomb lendong nung sepai 4 asü, aika yiru

Quetta, Rongjui/Sept. 05 (Agencies): Anisüngzük maliba southwestern Pakistan nung takum bendanga agütsür kati pa temang nung bomb alenloka aliba pokdakja paramilitary pezü asü aser civilian ana densema 19 yiru.

Balochistan province yimtiba, Quetta south tsütsü kilometer 25 pilar Quetta-Mastung Road nung paramilitary Frontier Corps temi anükba checkpoint tsütsü lendong agütsüsang ya tetsüng agi jaja aru, ta police tanishir Azhar Akram-i Deobarnü ashi.

Takum bendanga agütsür bomb pokloktsür ka motorcycle nung tapoktsü oset seret pongu inoka bener arua convoy ka nung gari ka dak atsük, ta Akram-i ashi.

Iba lendong nung karbo kangasa mejungi yirur lir aser asürtem ya timba akumtsü akok. Iba bomb apokba sülen temang shilem kar security post nungi pilar liasü, ta pai ashi.

Nokdanga aliba Pakistan Taliban, shirnok dang TTP ta ajar, parnoki iba lendong agütsü, ta tenüng agiogo.

Taliban teloki kidanger Afghanistan nung yimsü asü



Quetta, Pakistan tezülen checkpoint ka nung taküm bendanga agütsür bomb pokloktsüdak security ketdangsurtem arua aliba noksa nung angur. Deobarnü suicide bomber kati security checkpoint anasa bomb pokloktsüba lendong nung paramilitary züngsem pezü asü aser kar yirua liasü.

tenzükba sülen TTP ajanga Pakistan security forces dak amakba tenüng agiba tang mezüngbuba alitsü.

Kabul laoba sülen TTP yagi Afghan Taliban den tesendaktep tasen kuma yanglushia lir aser parnoki tawa-tanü ka nungi Pakistan mitkar anema mera talila agir.

TTP ajanga takum bendanga agütsür Mastung Road, Quetta nung FC checkpost amakba aitsür," ta Ato Kilonser Imran Khan-i Twitter nung zülü.

Balochistan nung küm 20 shi Baloch separatist telok temi gas aser ali rongsen peria aliba province ya nüjiso meshia arur.

Tesüiba mapang Balochistan nung security forces dak lendong agütsüba timba Baloch separatist telok, Balochistan Liberation Army aser Balochistan Liberation Front ajanga tenüng agia arua lir.

Balochistan ya Iran aser Afghanistan den arütsüa lir, aser ibai southwest Pakistan

nung tongtipang province ka lir, kong China-i China-Pakistan Economic Corridor dak sendakba project tem inyaker. Project nungya lenmang yangluba, power plants aser aluyimba tsütsü terenlok maparen balala sen dollar billion aika indoka inyaker.

China-i küm ishika tsüngta Arabian Sea nung aliba Gwadar indang deep-water port yangluba nung tongti shilem agia arur. Saka Pakistan aser China nung iba economic corridor project nung inyaker dak timtem agüja arur.

Taoba ita rongnendak Gwadar yimti nung takum bendanga agütsür bomb pokloktsür kati China nung mapa inyaker mena aliba gari ka anasa pai bena aliba bomb pokdakja lenmang tezülen Pakistan nung tanur ana asaya aliba asü aser China nung ana den Pakistan nung ka yirua liasü.

Taoba ita Quetta nung linük nisan ayokba dokan ka nung teka agi yangluba grenade ka mereplokja nisung ka takum samatsü aser nisung pezü yirua liasü, shirnok Pakistan nung Independence Day amungtsü atema nisan alia liasü.

Mon & Tening nung Poshan Maah tenzükogo

Mon, Rongjui/September 05, 2021 (TYO): Hokolbarnü (03.09.2021) DRDA Hall nung, blocks (ICDS) Mon den longjemer "Converging towards a healthy walk through life" omen kübok Poshan Maah 2021 tenzükba sentong agiogo.

Poshan Maah sentong ya ADC, Mon, Chingak Konyak-i tenzükja liasü. Sentong takong nua inyaksü asoshi, Chingak-i Frontline Workers, Supervisors, Poshan Coordinators, Anganwadi Workers, Helpers aser teloktep Department tem dang telongjem lia aser bendanga agütsür inyaksü asoshi mepishia liasü.

Yimtsung tesem nung teti COVID-19 SOPs tetuyuba nung anidaksü asoshi pai staff tem ajungshiogo.

District Coordinator Child-Line Mon, Eunice Thalih ajanga tanurtem (arishi küm 0-16) indang tongmelang agi metetdaksü, kong tanurtem dak tim masüba mapa inyakba, parnok yirutsüba, samaba, azüabongba aser shi nung medemtsü meranga ken o atema anogoshia (24x7) toll free no 1098 service lapoka lir, ta lai metetdakja liasü.

Iba sentong nung LDA (ICDS), Angun Wagnshu

menden liasü. District Coordinator Poshan, Nokyam Khoiyem-i POSHAN MAAH 2021 inyakyim aser maparen balala indang tongmelang agi telok dang metetdaksü.

DPO (ICDS) Mon, Y. Tauhong Ngyen-i tepela anküp o jembi, ta kasa sangdong nung shia lir.

PEREN : District Administration aser Department of Social Welfare ajanga Tening nung ita piyong ayonga agütsü aliba "Poshan Maah" sentong tenzüksüogo.

Poshan Maah tenzükba sentong nung, CDPO Tening, Yanbeni Humtsoe-i, ita piyong agütsü aliba inyakyim tem telok dang metetdaksü, kong iba sentong kübok teinyaksü shilem pezü - temang anema alitsü atema Poshan Vatika, Yoga aser AYUSH; Nutrition Kits lema agütsü aser Severely Acute Malnutrition (SAM) jangjatsü aser Temang nung teyari agütsüba chiyongtsütem (nutritious food) lema agütsü asoshi maparentem dena lir.

EAC Tening, Tumben P. Tsanglao-i, Department ketdangsurtem dang pelaba metetdaksü. Iba den külemi, tanur aser tetsü tem atema temang nung teyari agütsüba

chiyongtsütem abensaa chia-ajemtsü nung tekümdangtsü osang sangoktsütsü asoshi Anganwadi nung inyakertem dang ambassador tem akümsü asoshi ajungshia liasü.


Tsanglao-i, India nung tanur shilem 50% shi malnutrition tapu kati timtemdar ta telok dang lepshia ashi aser iba sentong (Poshan Maah) ajanga nutrition jenjang melenshütsü akok, kong tanur ka dak temang shilem nung teyari agütsüba dak alaka tanur ka tekolok nung yaritsü atema kanga tongtibang, ta pai metetdaksü.

Iba sentong nung Block Coordinator Tening, Dibinbo menden liasü aser Supervisor, Tening, Sheo Medeo-i tepela anküp o jembi.

2018 küm nungi tenzükba, POSHAN Abhiyaan mapatong shilem ama küm shia September ita "POSHAN Maah" amunger. Temang nung teyari agütsüba chiyongtsütem abensaa/peria chia-ajemtsü aser ibaji ajanga temelenshi adokdaksütsü nükjidong nung iba sentong agir.

"Poshan Vatika" shilem ama, sentong nung adenertem nem süngjanglijang südongtem lema agütsüogo, ta kasa sangdong nung shia lir.

MULUNGNIEN O



August 26, 2021 Anogo nung onoki kanga dang meima aliba Asür LIMABENDEN LEMTUR Mokokchung (Longmisa), Akumli wadang tempanger teti alitsü limai ogo.

Pa shiranga alidang nungi Asü-bila mapang tashi nung, Kinunger adianutem, Kiyonger, Yimtsür yimer, Tembartem, Kija, Kibong aser Lokti balala shirnokisa, ozü asüko mapang nung nübo, rongsen aser Sarasadem den maparen balala nung yaritepogo, nenok ajak dang kangasa pelaba lemsateper.

Nenok mapa tajung asoshi, tanu ozüi nenok nem kecha meyipba magutsüteter, saka takar Tsüngremi nenok ajak moshia moajang ta sarasadema adar.

Temeim Kinungsü, aser Chirurtem.

Tuensang nung Fit India Freedom Run agiogo



Tuensang, Rongjui/September 05, 2021: Deputy Commissioner Office Complex, Tuensang nung, DC Kumar Ramnikant-i 'Fit India Run' tenzüksüba mapang tangokba noksa ka yangi angur.

Tuensang, Rongjui/September 05, 2021 (TYO): "Azadi Ka Amrut Mahotsav India" shilem ama, Honibarnü (04.09.2021) Tuensang DNKYS-i 'Fit India Freedom Run' ayonga agiogo. Iba sentong ya DC Office complex nungi Loyem Memorial Ground, Tuensang tashi agia liasü.

Deputy Commissioner Tuensang, Kumar Ramnikant-i

iba run' tenzüksü (flag off), kong Sao Chang Government College aser Loyem Memorial College, Tuensang nungi NSS volunteer 75 agi shilem agiogo. Iba sentong nung shilem tajung agiba asoshi DC-i, shilem agirtem dang pelaba metetdaksü aser maparen ajak nung ochishia aser tajung ajiteta inyaksü asoshi parnok ajungshiogo, ta sangdong ajanga metetdaksü.

41 AR Kiphire-i kaketshir nem tenüngsang agütsü

Kiphire, Rongjui/September 05, 2021 (TYO): 2021- 2022 academic year atema Sainik School, Punglwa nung azüngtsü shimteta alir kaketshirtem atema 41 Assam Rifles, Kiphire-i tenüngsang agütsüba sentong ka ayongzük.

Honibarnü (04.09.2021) Kiphire nung iba sentong agia liasü.

Deputy Commissioner Kiphire, T.Wati Aier, NCS-i, kaketshirtem dang tali meranga azüngtsü asoshi ajungshi, kechiyong tawa tanü zünga shia meteter kaketshir aika mapa mengui lir, ta pai ashi.

Kaketshirtem dang Sainik School nung azüngtsü merangtsüla, kechiyong item school nung azüngba ajanga maongka tajung balala talisa Armed Forces nung adentsü asoshi maongka angur, ta pai ashi.

Kaketshir ka tekolok renlokdaksütsü aser temang anepalubaren tsütsü nungita yaritsü asoshi iba school nükjidong lir, ta pai ashi. Tarutsü nung lokti ajungkettsütsü asoshi wadang balala nung ketdangsur tajung ka ka akümsü asoshi DC Wati-i teshimtet kaketshirtem (Sainik School nung azüngtsüpur) ajungshiogo.

Teshimtet kaketshirtem atema

tenüngsang agütsüba sentong ayongzükba aser iba den külemi Kiphire tesem nung anentsüh agi nüburtem senzüsönongtsü mekoki alidang teyari agütsüba asoshi pai Assam Rifles Bn dang pelaba metetdaksü.

Maneni, iba sentong nung 41 Assam Rifles Commander-i, teshimtet kaketshirtem ajangzüksü asoshi meranga aser bendanga agüja inyakba atema tsürabur, School indang tesayurtem aser Principal dang pelaba metetdaksü.

Pai ashiba agi, Sainik School 33 lapoka lir aser ano Sainik School ana yanglutsü asalentong yangludar.

Marks tajung angurtem nem maongka aika agütsütsü renemer asünung, kaketshirtem dang tali meranga azüngtsü asoshi pai ajungshia liasü.

2020 küm India Sorkar ajanga tetsürtem Sainik School nung azüngtsü asoshi melaba sangdongogo, ajiasünung tarutsü nung pei jala Sainik School-i yoktsü asoshi pai tsürabur aser tesayur tem dang mepishio.

Sainik School Punglwa nung azüngtsü asoshi tetsür ka aser tebur ana densema kaketshir 3 shimtetogo. Kaketshir pezü shi waiting list nung liasü.

Deepika-i Chhanv Foundation nung lakh 15 tenla agütsü

Mumbai, Rongjui/September 05, 2021 (Agencies): Bollywood actress Deepika Padukone-i Bala Prajapati yaritsü atema, lai Chhanv Foundation nung lakh 15 tenla agütsü.

Bala Prajapati, shiba nisung tamajungeri acid amshia amakba nungi jenbur ka lir, lai 2020 film 'Chhapaak' nung Deepika den külemi shilem agiogo. Bala tezüngjang melentsüsa (transplant) nügdaka akümba yong, Deepika-i rongsen agi la yaritsü molungtet. Bala tezüngjang melentsü atema sen lakh 16 shi adoktsü ta asadangteta liasü.

'Padmaavat' nung tongti shilem agila Deepika-i iba osang angashili dang lai aritepa Bala tezüngjang melentsü atema taa shilem 90 shi agütsü. Deepika-i Chhanv Foundation nem iba tenla agüja liasü, koba Bala atema tetenlartemi sen bendentsü asoshi tenzükba online drive ka asütsü.

Chhanv Foundation nungi

Ashish Kumar-i ashiba agi, Bala tezüngjang melentsü atema osang angashir sülen, Deepika-i transaction balala ana nung sen lakh 15 tenla agütsü.

Maneni acting tsütsü, Deepika-i Kabir Khan indang "83" nung Ranveer Singh den külemi shilem agiba angutsü. Iba film nung Ranveer Singh-i cricket asayar Kapil Dev ama shilem agütsü. Kasa movie nung Deepika-i Kapil kinungsü Romi Dev shilem agiba angutsü.

Deepika, shiba taküm April ita Mumbai Academy of Moving Image (MAMI) toktsüba osang sangoktsüogo, lai ano 'Baiju Bawra', 'Fighter', 'Sanki', 'Pathan' aser Nancy Meyers indang 2015 hit Hollywood film 'The Intern' nung ajemdaker yanglutsü aliba Hindi film densema tongtibang project balala nung shilem agütsü tebilemba lir.

Pathan film atema, Shah Rukh Khan aser Deepika Padukone nati

Spain nung ken ka tangoktsü. Siddharth Anand-i iba film direct asütsü.

Shah Rukh aser Deepika nati Spain nung film indang tongtibang shilem balala dang masü, ken tongtibang ka iba linik nung tangoktsü terenemba lir. SRK aser Deepika dak alaka "Pathan" nung John Abraham-ia tongti shilem agiba angutsü. Iba movie dak sendakba nung tanga maparentem film yanglurtemi osang tejanga magütsü.

Pathan dak alaka, Deepika Padukone aser Hrithik Roshan na 'Fighter' nung külemi shilem agiba angutsü. Iba film ya India indang mezüng aerial action genre film ka asütsü. Siddharth Anand-i direct asütsü aliba film ya technology aser film tangokba yimya tasen aika amshia yanglutsü asalentong lir. Iba den külemi film ya alima tesem balala nung tangoktsü. Film yanglurtemi "Fighter" film 2022 küm sayatsü sentong lir.



Dimapur, Rongjui/September 05, 2021: Hokolbarnü (03.09.2021) Dimapur Ao Baptist Arogo (DABA), Asso. Pastor N. Imtatsung Imchen-i Purana Bazar, Dimapur nung Bridge Music Academy meshiteta sarasademtsüba sülen tangokba noksa ka yangi angur.

Paralympics: Krishna-i gold aser Suhas-i silver medal angu



Krishna Nagar

Rongjui/September 5, 2021 (Agencies): Tanga Tokyo nung asayaa aliba Paralympics nung Deobarnü Krishna Nagar-i Gold medal ka ngua India nunger badminton asayartem rongnungi iba asaya nung gold medal angur tanabuba asayar kumogo.

Krishna-i tebur kija asaya SH6 event final nung Chu Man Kai 21-17, 16-21, 17-21 agi koka gold medal nguogo.

Ajak sentepet India nunger asayartem tang asayaa aliba Paralympics nung gold medal pongu kokteter lir.

Arishi kum 22 tain Krishna shiba Rajasthan nungi lir, pa BWF world rankings dak ajemdaker Paralympics atema qualify asu. April ita pai Dubai

2021 Para Badminton International nung gold medal ana ngua liasü.

Krishna ya short-stature impairment agi kangshir, koba par kinungertemi pa kum ana asüba mapang jangjaa akum.

Pa ina atuba mapang asaya kar nungbo shilem magitetsü ta meteta akum, saka pai kanga kara asemteter asunung asemtepba nung shilem agi. Ajisüaka par adianu kati ajungshiba sülen pa 2014 kum nungi badminton asaya tenzük aser kum asem sülen pai iba asaya süoki ia asaya tenzük.

Para-badminton ya takum mezüngbuba Paralympics nung benoka asayadaki.

Kasa mapang nung Deobarnüsa Suhas Yathiraj-i badminton tebur kija asaya

SL4 category nung silver medal ka ngua India nunger Indian Administrative Service (IAS) officer tem rongnungi Paralympics nung medal ka anguba mezüngbuba asayar kumogo.

Final asaya nung pa France nunger asayar Lucas Mazur-i 21-15, 17-21, 15-21 agi tsükdakja liasü.

Suhas ya 2007 batch IAS officer ka lir aser India nunger bureaucrat tem rongnungi Paralympics nung shilem agiba mezüngbuba asayar lir. Arishi kum 38 asayari mezüngbuba asaya ana ayong ayonga akok aser semifinal nung Indonesia nunger asayar Fredy Setiawan 21-9, 21-15 agi koka final-i ai.

Tanga round tem nung ama final nung Mazur-i Suhas ayong ayonga masayadaksü. Pai mezüngbuba set-bo akok ajisüaka tanungba set ana ya Mazur-i koka liasü.

Suhas ya NIT Karnataka nungi computer engineer graduate ka lir aser pai Prayagraj, Agra, Azamgarh, Jaunpur, Sonbhadra district tem nung district magistrate mapa inyakogo. Pa tang Gautam Buddh Nagar (Noida) indang district magistrate lir.

US Open: World No. 1 Ash Barty tsükogo; Djokovic-i takok angu



New York, Rongjui/September 5 (Agencies): Tetsürtem rongnungi world number one asayar Ash Barty Honibarnü U.S. Open round tasembuba nung tsükogo.

La America tsür Shelby Rogers-i 6-2 1-6 7-6(5) agi koka liasü.

Barty-i tetenzük nungi junga masayatet aser mezüngbuba set tasembuba game nung double faults pezü menaa Rogers nem la indang serve break südaksü aser iba den lai mezüngbuba serve-a den junga motet aser unforced errors 17 tashi menaa mezüngbuba set makok.

Tanabuba set nung Barty-i akhi ama kanga junga asaya aser game pezüububa aser trokbuba nung Rogers indang serve break süa asaya ayong ayonga akok.

Tatembangbuba set nung Barty 5-2 agi tejakdang liasü aser asaya akoktsü imlaa aliba mapang Rogers-i game pezü atonga koka tiebreak asayatsüsa akum.

Tiebreak nung Rogers-i tajungba asaya aser Barty den trokbenbuba asayaba nung mezüngbuba koka liasü.

Kasa asayamung tebur kija asaya nung Honibarnü Novak Djokovic-i 6-7(4) 6-3 6-3 6-2 agi Kei Nishikori madak takok ngua round pezüububai iogo. Pa tang Grand Slam 21buba aser kum nung Grand Slam pezüprongla akoktsü atema meranga asayadar.

Denmark nunger asayar Holger Rune aser Dutch nunger asayar Tallon Griekspoor den round ana ayong ayonga asayaba sülen tasembuba round nung Nishikori-i Djokovic nem timtem agüja liasü.

Asaya nung mezüngbuba set bo Nishikori-i akok ajisüaka tanungba set asem Djokovic-i koka liasü. Tena tsüingda tang tashi nung 20 ben asaya lir aser Nishikori-i anaben dang kokteta lir.


Djokovic taruba asaya US nunger asayar Jenson Brooksby mesera Russia nunger asayar Aslan Karatsev den asayatsü.

Umpire telemtetba anemba atema KL Rahul dang senchi achi

Dubai, Rongjui/September 5 (Agencies): India nunger opener KL Rahul dang Deobarnü pa indang march fee shilem 15 senchi chiogo. England den London nung pezüububa Test asayaba mapang pezünububa nung umpire-i telemtetba ka agi pa out sütsüba anemba atema senchi achi.

Iba tatalokba ya Honibarnü India nunger tanabuba innings nung over 43buba nung ataloka liasü. Iba asaya nung pai ball 101 nung run 46 yanglur aliba mapang James Anderson-i out sütsü.

"ICC Code of Conduct for Players and Player Support Personnel, Article 2.8 nung Rahul-i aibelenba ngutetogo. Iba ocet ya International asaya ka nung Umpire-i telemtetba ka agiba anemba dak sendaka lir," ta ICC sangdong ka ajanga



metetdaksü.

Iba den bendenloksema Rahul indang disciplinary record nung demerit point ka bendenloktsüogo. Iba ya ita 24 tsüingda pa asoshi mezüngbuba aibelen asütsü.

Rahul-i aibelen agizükogo aser ICC Elite Panel of Match Referees nungi Chris Broad-i benokba temerenshi agizükogo.

On-field umpires Richard

Illingworth aser Alex Wharf, third umpire Michael Gough aser fourth official Mike Burns nungeri pa anema ken o benoka liasü.

Level 1 nung aibelenra temerenshiji official reprimand ka, asayar ka indang match fee shilem 50 tashi aser demerit points ka mesera ana agütsür.

Ita 24 tsüingda asayar ka nem demerit points pezü mesera iba dak tali agütsüra iba point ya suspension points-i melentsür aser aibelenba aliba asayar nem tenokdangba agütsür.

Suspension points ana ngura Test ka mesera ODI ana mesera T20I ana, koba tama südir iba asaya nung asayatsü nungi nokdang.

Demerit points ya asayar indang disciplinary record nung ita 24 alir aser iba sülen aginer.



1buba Brotherhood Coordination senden ka September 4 nü Chakesang Youth Front, Chakroma Youth Organisation aser Western Sumi Sports Association tsüingda Hotel Cedar Dimapur nung menogo. Iba senden ya "Eradicating 'Ism' among the Rizes through sports," Omen nung ajemdaker amen aser September 12 nü DDSC Stadium nung Western Sumi Sports Association-i achaayanga asaya anogo ka ayongzüka amungtsü bangjemogo.

India coach Ravi Shastri dak Covid-19 potetogo

Rongjui/September 5, 2021 (Agencies): India team atema takoksa tulu ajurua head coach Ravi Shastri dak COVID-19 tashidak potetogo. Pa, bowling coach Bharat Arun, Fielding Coach R Sridhar, aser Physiotherapist Nitin Patel nunger den külemi lokti nungi aninogo, ta BCCI-i ashi.

Parnok ajak Deobar anepdang RT-PCR test agiogo aser team den anidaka Oval stadium-i mao.

BCCI sangdong ajanga, "yashi nikongtsütsü Shastri dak tashidak keta aliba osang aruba sülen kümdangshia alitsü atema BCCI Medical Team-i Head Coach Ravi Shastri, Bowling Coach B Arun, Fielding Coach R. Sridhar aser Physiotherapist Nitin Patel nunger lokti nungi aninogo," ta ashi.

"Parnok ajaka RT-PCR ajanga tashidak tendangogo aser medical team nungi osang tejangja ka maru tashi Team India den mesenzütsü aser team hotel nung dang munga atatsü. Team India nung tanungba züngsemtem ajak yasüng aser tanep ta Lateral Flow Tests ana agiogo. COVID reports

negative aruba sülen asayartem tang Oval nung asayaa aliba Test nung shilem agitsü temelaba agütsüogo," ta BCCI-isa ashi.

Hopta asem break agiba mapang Rishabh Pant dak COVID tashidak potetba sülen India team nung züngsemtem ajak anogoshia lateral flow tests agia arudar.

Team hotel nung tangar densema pa indang kakat sayaba sentong nung Shastri shilem agiba sülen tashidak mena asütsü ta bilemer.

"UK nung tenokdangba kecha agüja mali asunung Shastri indang kakat sayaba sentong nung tanga tejaokertema dena liasü. Item nisungtem den pa ajurutepogo, anunggi iba ajanga tangbo lokti nungi pilaa alitsüsa kumogo," ta BCCI source kati ashi.

"Bharath Arun atema tezüdangtsüka, tang agi tanabenbuba tangar ka dak tashidak potetba ajanga lokti nungi pilaa alitsüsa kumogo. Taoba mapang masseur Dayanand Garani dak tashidak potetba ajanga pa anintsüsa akum," ta paisa ashi.

BILEMDANGANG

"Mebilemdangi jembizüka yokba o meyipa agitsü tasak."